

二九暝 (mî)

舊年全家吃團圓

伊佇灶腳偷偷仔剖椰子 (iâ-tsí)

下頰 (ē-hâi) 生發粿

毋願看醫生

/

啊

嘛袂當講是毋願啦

歌仔戲看久嘛知影當時會散戲

只是最近

心內定定浮起少年時的景致 (kíng-tì)

若是會當佮閻羅倒參詳

伊希望家已擱演半齣仔郭春美

嘛毋通做葉青 (tshinn)

/

病過百日

規身軀親像予人插佇著火的田中央

無通覘 (bih)

加護病房失去故鄉的牛屎味

三魂七魄嘛鬥 (tàu) 袂轉去

吊大筒已經算是尚輕的酷刑

/

某团逐日下班就來訪視

萬金油當作祭改佇咧推

有擱卡濟的時間

伊感覺家已所面對的不是癌症

是數十年前

彼個呷菸嘍 (pōo) 檳榔 搏無牌支

轉去厝內煞佇某团身軀頂

留下青 (tshenn) 暗蘋果 (ling-goo) 的放蕩人

/

今年二九暝

圍爐有團無圓

窗仔邊飛過山伯

毋知咁是伊？

/

二九暝

一暝若一年

一年過一年